



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08 i 5/22), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2020. GODINU **POKRETA DEMOKRATSKE AKCIJE**

## SADRŽAJ

|  |   |
|--|---|
| MIŠLJENJE REVIZORA.....                  | 3 |
| 1. UVOD.....                             | 4 |
| 2. PREDSTAVLJANJE POLITIČKE STRANKE..... | 4 |
| Predmet pregleda i kontrole.....         | 5 |
| Cilj pregleda i kontrole.....            | 5 |
| Obim pregleda i kontrole.....            | 5 |
| 4. PRETHODNE KONTROLE I REVIZIJE .....   | 5 |
| 5. NALAZI I PREPORUKE.....               | 6 |
| 5.1 NALAZI .....                         | 6 |
| 5.2 PREPORUKE.....                       | 9 |

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Pokreta demokratske akcije za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

**Pregledom godišnjeg finansijskog izvještaja za 2020. godinu, utvrđeno je da je Pokret demokratske akcije prekršio odredbe člana 4. stav (1), člana 5. stav (4), člana 8. stav (1) tačka e), člana 11. stav (1) i člana 12. stav (1) i stav (4) Zakona o finansiranju političkih stranaka.**

**Pregledom, odnosno kontrolom finansijskih izvještaja, osim gornjih napomena, nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Pokreta demokratske akcije za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2020. godinu, Pokret demokratske akcije se finansirao iz sljedećih izvora:

| R/B       | Izvori finansiranja  | Iznos (KM)        | Struktura (%) |
|-----------|--|-------------------|---------------|
| 1.        | Članarina  | 23.562,40         | 10,71         |
| 2.        | Prilozi fizičkih lica ( 3-a )                                      | 16.770,00         | 7,62          |
| 3.        | Prilozi pravnih lica ( 3-b )                                       | 3.900,00          | 1,78          |
| 4.        | Prihodi od imovine ( 3-c )   | 0,00              | 0,00          |
| 5.        | Prihodi od dobiti preduzeća u vlasništvu političke stranke ( 3-d ) | 0,00              | 0,00          |
| 6.        | Prihodi od poklona ( 3-e )   | 0,00              | 0,00          |
| 7.        | Prihodi iz budžeta ( 3-f )   | 174.936,15        | 79,55         |
| 8.        | Prihodi od propagande ( 3-g )                                      | 0,00              | 0,00          |
| <b>I</b>  | <b>Ukupni prihodi (1-8)</b>  | <b>219.168,55</b> | <b>99,66</b>  |
| <b>II</b> | <b>Ostali prihodi i drugo</b>                                      | <b>745,00</b>     | <b>0,34</b>   |
|           | <b>Izvori finansiranja (I+II)</b>                                  | <b>219.913,55</b> | <b>100,00</b> |

U godišnjem finansijskom izvještaju stranka je iskazala rashode u ukupnom iznosu od 332.530,56 KM.

## 2. PREDSTAVLJANJE POLITIČKE STRANKE

Naziv političke stranke je Pokret demokratske akcije. Skraćeni naziv je PDA.

Stranka je registrovana kod Općinskog suda u Tuzli, Rješenjem broj: 032-0-Reg-18-000577 od 30.03.2018. godine. Rješenjem Općinskog suda u Tuzli broj: 032-0-Reg-18-000577 od 26.04.2018. godine izvršena je promjena lica ovlaštenog za zastupanje stranke, te je umjesto Senada Alića, dotadašnjeg predsjednika stranke upisan Mirsad Kukić kao predsjednik stranke. Rješenjem Općinskog suda u Tuzli broj: 032-0-Reg-22-000304 od 07.03.2022. godine izvršena je promjena lica ovlaštenog za zastupanje stranke, te je umjesto Mirsada Kukića, dotadašnjeg predsjednika stranke upisana kao predsjednica stranke Elzina Pirić.

Sjedište političke stranke je u Tuzli, ulica Fra Grge Martića 8.

Lica ovlaštena za zastupanje stranke u 2020. godini su Mirsad Kukić, predsjednik stranke, Elzina Pirić, zamjenica predsjednika i Samir Imamović, generalni sekretar.

Lice ovlašteno za podnošenje finansijskog izvještaja za 2020. godinu je Muzafer Brigić.

Prema podacima iz godišnjeg finansijskog izvještaja za 2020. godinu, Pokret demokratske akcije ima sljedeću organizacionu strukturu:

- Centralne organe,

- 6 kantonalnih odbora,
- 5 regionalnih odbora,
- 3 gradska odbora,
- 49 općinskih/opštinskih odbora i
- Odbor Brčko distrikt BiH.

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Pokreta demokratske akcije za 2020. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u novembru 2020. godine.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je ostvarila troškove izborne kampanje u okviru zakonom utvrđenog limita.

**Obim pregleda i kontrole** finansijskih izvještaja Pokreta demokratske akcije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava sa posebnim naglaskom na prihode iz budžeta i troškove kampanje.

### **4. PRETHODNE KONTROLE I REVIZIJE**

Pregled i revizija finansijskih izvještaja Pokreta demokratske akcije vršeni su za 2018. i 2019. godinu, nakon kojih su izdati izvještaj o pregledu, odnosno izvještaj o reviziji sa mišljenjem revizora, nalazima i preporukama revizije.

Služba za reviziju je izvršila reviziju godišnjeg finansijskog izvještaja Pokreta demokratske akcije za 2019. godinu, nakon koga je izdat izvještaj o reviziji sa nalazima revizije, mišljenjem revizora i preporukama stranci: da program utroška sredstava sačinjava na način da se obezbijedi potpuna transparentnost trošenja sredstva i da finansijska sredstva osigurana za finansiranje političke stranke koristi u skladu sa svojim programom i statutom, da članarine, prikupljene u gotovini, uplaćuje na transakcijski račun u zakonom propisanom roku, da uspostavi blagovremene i potpune evidencije o prihodima, rashodima i obavezama, da poslovanje gotovinom uspostavi u skladu sa principima i pravilima blagajničkog poslovanja i da finansijske izvještaje koje podnosi Centralnoj izbornoj komisiji Bosne i Hercegovine dostavlja na način utvrđen Pavilnikom o godišnjim finansijskim izvještajima političkih stranaka. Pored navedenog, stranci je preporučeno i da izvrši usaglašavanje obaveza sa dobavljačima i provede odgovarajuća knjiženja u poslovnim knjigama, da poštuje finansijske propise, odnosno Uredbu o uslovima i načinu plaćanja gotovim novcem i da obrati pažnju na ispravnost knjigovodstvenih isprava.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2020. godinu, utvrđeno je da Pokret demokratske akcije nije ispoštovao ranije date preporuke.

## 5. NALAZI I PREPORUKE

### 5.1 NALAZI

#### a) Pokret demokratske akcije nije postupio u skladu sa odredbama člana 4. stav (1) Zakona o finansiranju političkih stranaka<sup>1</sup>.

Stranka je u godišnjem finansijskom izvještaju iskazala ukupne troškove u iznosu od 332.560,56 KM. U svom Programu utroška sredstava za 2020. godinu, stranka je planirala ukupne troškove u iznosu od 425.000,00 KM.

Analizom Programa utroška sredstava za 2020. godinu, Služba za reviziju je utvrdila da je stranka finansijska sredstva u iznosu od 66.615,02 KM utrošila mimo utvrđenog programa utroška sredstava za 2020. godinu, i to:

- Stranka je prekoračila planirane troškove zakupa poslovnih prostora, troškove reprezentacije, troškove ostalog materijala, takse, novčane kazne i dr. naknade, naknade za topli obrok, prevoz i regres, ostale rashode, troškove ugovora o djelu, troškove premije osiguranja imovine, troškove poštarine i internet usluga, troškove fiksnog telefona, troškove usluga i ostale troškove propagande, kako slijedi: troškove zakupa poslovnih prostora u iznosu od 14.384,40 KM, troškove reprezentacije u iznosu od 23.070,00KM, troškove ostalog materijala u iznosu od 6.081,31 KM, takse novčane kazne i dr. naknade u iznosu od 10.022,00 KM, naknade za topli obrok, prevoz i regres u iznosu od 152,00 KM, ostale rashode u iznosu od 4.332,14 KM, troškove ugovora o djelu u iznosu od 6.846,68 KM, troškove premije osiguranja imovine u iznosu od 407,53 KM, troškove poštarine i internet usluga u iznosu od 157,65 KM, troškove fiksnog telefona u iznosu od 173,05 KM, troškove usluga u iznosu od 433,45 KM i ostale troškove propagande u iznosu od 554,81 KM.

Na osnovu naprijed navedenog, utvrđeno je da je Pokret demokratske akcije prekršio odredbe člana 4. stav (1) Zakona o finansiranju političkih stranaka, jer je dio finansijskih sredstva utrošio mimo utvrđenog Programa utroška finansijskih sredstava za 2020. godinu.

#### b) Stranka je prekršila odredbe člana 5. stav (4) i člana 8. stav (1) tačka e) Zakona o finansiranju političkih stranaka.

Tokom obavljanja pregleda finansijskog izvještaja Pokreta demokratske akcije, utvrđeno je da je stranka primila nenovčane donacije od fizičkog lica Alena Kamerića i fizičkog lica u Gradskom odboru PDA Gradačac čiji identitet nije bilo moguće utvrditi, te iste nije evidentirala u poslovnim knjigama i nije iskazala u finansijskom izvještaju, čime je prekršila odredbe člana 5. stav (4) i člana 8. stav (1) tačka e) Zakona o finansiranju političkih stranaka. Takođe, za pomenute nenovčane donacije stranka nije izdala potvrde donatorima o primljenom prilogu, čime je prekršila odredbe člana 6. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) - u daljem tekstu: Pravilnik.

- Uvidom u službene evidencije utvrđeno je da je stranka, odnosno njen kandidat Alen Kamerić platio sponzorisanu objavu na društvenoj mreži „Facebook“, te se promovisao kao kandidat stranke na Lokalnim izborima 2020. godine, a prije zvaničnog početka kampanje.

Na zahtjev Centralne izborne komisije BiH da dostavi dokumentaciju u vezi sa navedenom promocijom i plaćanjem iste, stranka je dostavila izjašnjenje fizičkog lica Alena Kamerića u kojem isti ne poriče da je platio društvenoj mreži „Facebook“ sponzorisanu objavu. Na taj način stranka je primila nenovčanu donaciju Alena Kamerića, kandidata stranke za Lokalne

<sup>1</sup> U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

izbore 2020. godine, koju je bila dužna prijaviti u svom finansijskom izvještaju i evidentirati u poslovnim knjigama.

- Uvidom u službene evidencije utvrđeno je da je Gradski odbor PDA Gradačac platio sponzorisanu objavu na društvenoj mreži „Facebook“ prije nego što je zvanično kampanja počela.

Stranka je dostavila obavijest Gradskog odbora Gradačac u kojem se navodi da je sponzorisanu objava plaćena novčanim sredstvima fizičkog lica, a ne sredstvima stranke. S obzirom da iz navedene obavijesti nije moguće utvrditi identitet fizičkog lica koje je platilo navedenu objavu, stranka je primila nenovčanu donaciju anonimnog donatora, a koja je zabranjena Zakonom o finansiranju političkih stranaka.

Stranka u poslovnim knjigama nije evidentirala i u finansijskom izvještaju nije prijavila nenovčanu donaciju anonimnog donatora, čime je prekršila odredbe člana 5. stav (4) Zakona.

**c) Pokret demokratske akcije je prekršio odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Pregledom godišnjeg finansijskog izvještaja, utvrđeno je da Pokret demokratske akcije nije uspostavio potpune, tačne i pravovremene evidencije o svojim prihodima i rashodima, nije prijavio sve transakcijske račune, nije postupio po principima blagajničkog poslovanja i nije obrasce godišnjeg finansijskog izvještaja za 2020. godinu popunio u skladu sa Pravilnikom, čime je prekršio odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- (1) Stranka u obrascu 2 (pregled prometa svih transakcijskih računa političke stranke) godišnjeg finansijskog izvještaja nije prijavila transakcijski račun broj: 3384402252762190 kod UniCredit bank d.d. Sarajevo, čime je prekršila odredbe člana 11. Pravilnika. Stranka po navedenom transakcijskom računu nije ostvarila promet u 2020. godini.

- (2) Na osnovu dostavljenih blagajničkih dnevnika sa priložima OO PDA Banovići utvrđeno je da stranka nije vodila blagajnu u skladu sa pravilima i principima blagajničkog poslovanja.

Uvidom u blagajničke dnevnike od 24.01. i 24.02.2020. godine utvrđeno je da stranka nije pravila nalog blagajne za naplatu članarine, za svaku uplatu posebno, već zbirni nalog naplate i to kao članarina, a u prilogu su izdate potvrde o primljenoj članarini iz koje se vidi uplatilac. Takođe na nalogu nedostaje potpis lica koje je uplatilo sredstva.

- (3) Uvidom u ostale prihode stranke utvrđeno je da je stranka u 2020. godini evidentirala u svojim poslovnim knjigama knjižnu obavijest o greškom izvršenom fakturisanju dobavljača „Gradačački sajam“ i to iz 2018. godine, što ukazuje na to da stranka nema ažurne i pravovremene evidencije o poslovnim događajima.

- (4) U obrascu 3 i 3-e finansijskog izvještaja (Nenovčane donacije i računi koje stranka nije imala obavezu platiti) stranka nije iskazala nenovčanu donaciju dva fizička lica koja su platila društvenoj mreži „Facebook“ sponzorisanu objavu za promociju kandidata na Lokalnim izborima 2020. godine, čime je prekršila odredbe člana 13. i 18. Pravilnika.

- (5) Pregledom godišnjeg finansijskog izvještaja, poslovnih knjiga i dodatne dokumentacije utvrđeno je da stranka nije uspostavila potpune i tačne evidencije o rashodima, te ih nije iskazala u godišnjem finansijskom izvještaju u obrascima 4 (rashodi političke stranke), 4.1 (režijsko-administrativni i ostali troškovi) i 4.2 (troškovi kampanje), čime je prekršila odredbe člana 21., 22. i 23. Pravilnika.

- Kontrolom troškova propagande utvrđeno je da stranka nije prijavila i nije evidentirala troškove propagande koji su nastali promovisanjem kandidata Alena Kamerića i kandidata Gradskog odbora PDA Gradačac, što je suprotno odredbama člana 21. i 23. Pravilnika. Nastale troškove stranka je imala obavezu prijaviti u obrascu 4.2 finansijskog izvještaja.
- Stranka je u finansijskom izvještaju i poslovnim knjigama iskazala ostale rashode u ukupnom iznosu od 2.423,70 KM.  
Uvidom u analitičke kartice dobavljača i pismeno obrazloženje stranke, utvrđeno je da je stranka na kraju 2020. godine uočila pretplate po analitičkim karticama dobavljača.<sup>2</sup> Zbog nedostatka dokumentacije, odnosno računa dobavljača, navedene pretplate stranka je sa kartica dobavljača isknjižila na teret rashoda iz ranijih godina, što govori u prilog činjenici da stranka nema uvid u svoje stvarne troškove.  
Takođe, stranka je navedene pretplate isknjižila bez odgovarajuće dokumentacije odnosno bez donesene odluke.
- Uvidom u ugovore o zakupu poslovnih prostora utvrđeno je da su troškovi zakupa za sljedeće opštinske odbore evidentirani i iskazani u većem iznosu u odnosu na ugovorenu cijenu zakupa ukupno za 1.863,22 KM: OO PDA Srebrenik u iznosu od 662,16 KM, OO PDA Zavidovići u iznosu od 367,62 KM i OO PDA Banovići u iznosu od 833,44 KM, dok je utvrđeno da su sljedeći opštinski odbori troškove zakupa iskazali u manjem iznosu u odnosu na ugovorenu cijenu zakupa ukupno za 3.535,00 KM: OO PDA Žepče u iznosu od 2.250,00 KM, OO PDA Kakanj u iznosu od 250,00 KM, OO PDA Breza u iznosu od 585,00 KM i OO PDA Živinice u iznosu od 450,00 KM.

(6) Uvidom u analitičku karticu dobavljača „Leftor“ Tuzla utvrđeno je da je stranka neosnovano uvećala promet za navedenog dobavljača. Naime, stranka je u 2020. godini od dobavljača „Leftor“ Tuzla primila sredstva u iznosu od 315,90 KM na ime „povrata više uplaćenih sredstava“, a što je evidentirala na potražnoj strani kartice dobavljača, kao povećanje obaveze prema dobavljaču, te je na taj način neosnovano uvećala sam promet po kartici dobavljača za navedeni iznos.

**d) Stranka nije platila troškove izborne kampanje putem transakcijskog računa koji je otvorila za finansiranje izborne kampanje.**

Pregledom je utvrđeno da su dio troškova izborne kampanje koji se odnose na sponzorske objave i promociju kandidata putem društvene mreže „Facebook“ za stranku platila dva fizička lica.

S obzirom da su navedeni troškovi vezani za kampanju plaćanje je trebalo izvršiti sa namjenskog računa broj: 1321002019845170 kod NLB banke koji je otvoren za finansiranje troškova kampanje, koji je stranka navela u prijavi za učešće na Lokalnim izborima.

**Troškovi kampanje**

Prema odredbama člana 15.10 Izbornog zakona Bosne i Hercegovine, politička stranka za potrebe izborne kampanje ne smije potrošiti više od 0,30 odnosno 0,20 KM<sup>3</sup> po biraču u svakom izbornom

<sup>2</sup> JP Elektroprivreda u iznosu od 575,66 KM, Rudnik mrkog uglja Breza u iznosu od 585,00 KM, JP Vodovod i kanalizacija Zenica u iznosu 175,85 KM, JP Komunalno u iznosu od 117,96 KM, Šljivo Devleta u iznosu od 150,00 KM, BH Telekom u iznosu od 69,23 KM i zakup u Kaknju u iznosu od 750,00 KM.

<sup>3</sup> Član 15.10 stav 2. Izbornog zakona Bosne i Hercegovine propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.



krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, na osnovu broja birača, Pokret demokratske akcije je mogao potrošiti 465.990,27 KM.

Politička stranka je u godišnjem finansijskom izvještaju, koji je podnijela Centralnoj izbornoj komisiji BiH, u svrhu izborne kampanje iskazala troškove u iznosu od 79.927,85 KM<sup>4</sup>.

## 5.2 PREPORUKE

*Preporučuje se Pokretu demokratske akcije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da finansijska sredstva obezbijeđena za finansiranje stranke koristi u skladu sa utvrđenim programom utroška sredstava,*
- *da uspostavi evidencije o svojim nenovčanim donacijama,*
- *da se ne finansira iz izvora koji su zabranjeni političkim strankama,*
- *da uspostavi potpune, tačne i pravovremene evidencije o prihodima i rashodima,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka,*
- *da troškove kampanje plaća isključivo sa posebnog računa za finansiranje kampanje i*
- *da gotovinsko poslovanje uspostavi u skladu sa principima i pravilima blagajničkog poslovanja.*

### KOMENTAR:

Pokret demokratske akcije se očitovao na nalaze revizije date u Preliminarnom izvještaju o pregledu godišnjeg finansijskog izvještaja za 2020. godinu.

U očitovanju stranka je dostavila dokumentaciju o izvršenim knjigovodstvenim evidencijama ugovora o zakupu.

Služba za reviziju je uvažila sve argumentovane primjedbe stranke, te je u skladu sa istim korigovala nalaze revizije iz Preliminarnog izvještaja o pregledu.

šef Odsjeka za revizijske poslove

Sanja Tošović

revizor

Veliborka Kenjić

šef Službe za reviziju

Mr.sc Hasida Gušić

---

<sup>4</sup> Navedeni iznos troškova kampanje nije konačan, jer stranka nije uračunala troškove nastale plaćanjem sponzorisanih objava društvenoj mreži „Facebook“ koje su umjesto stranke platila dva fizička lica.